



**Nærøyfjorden
verneområde**styre

Postadresse

Nærøyfjorden verneområde styre
Njøsavegen 2
6863 Leikanger

Besøksadresse

Fjordsenteret
5745 Aurland

Kontakt

Sentralbord: +47 57 64 30 00
Direkte: +47 5764 3129

fmv/post@fylkesmannen.no

www.nasjonalparkstyre.no/naroyfjorden

CHARLES DEE CUNNINGHAM
Fresvik
6896 FRESVIK

Sakshandsamar Anbjørg Nornes

Vår ref. 2021/6496-0 432.2

Dykkar ref.

Dato 02.07.2021

Dispensasjon - Delegert vedtak - utviding av bygg - Snauasete - utedo på stølen

Sender vedlagt delegert vedtak frå Nærøyfjorden verneområde styre.

Informasjon om klagerett

Vedtaket kan klagast inn for Miljødirektoratet av partar i saka eller andre som har rettsleg klageinteresse med ein frist på 3 veker jf. forvaltningslova §§ 28-29. Klagen skal rettast til Miljødirektoratet, men sendast via verneområde styret v/sekretariatet, som kan gje nærare opplysningar om klagerett og rett til og sjå saksdokument.

Med helsing

Anbjørg Nornes
verneområdeforvaltar

Dokumentet er elektronisk godkjent

Kopi til:

Statsforvaltaren i Vestland	Njøsavegen 2	6863	LEIKANGER
Aurland kommune	Vangen 1	5745	AURLAND
SNO Aurland			
Villreinnemnda for			
Nordfjella, Fjellheimen og			
Raudafjell			



Utval	Delegeringssak (DS)
Nærøyfjorden verneområdestyre	

Delegert vedtak - utviding av bygg - Snauasete - utedo på stølen

Delegert vedtak

I medhald av delegeringsreglement vedteke av Nærøyfjorden verneområdestyre 30.11.2015, vert det gjort fylgjande vedtak:

Nærøyfjorden verneområdestyre gjev Stigen Gard og Turer v/Hege Strømme og Dee Cunningham dispensasjon til å utvide utedo-bygget på stølen Snauasete med eit vedlager. Bygget kan utvidast med 1 x 1 meter. Dispensasjonen er gjeve med heimel i verneforskrifta for Nærøyfjorden landskapsvernområde og naturmangfaldlova § 48 fyrste ledd og fyrste alternativ.

Løyvet er gjeve med fylgjande vilkår:

- Grunnflata på utedoen som det vart gjeve løyve til i sak 38/21 – 07.06.2021, kan utvidast til inntil 2 x 2 meter. Dørsida skal vera inntil 2 meter høg og ha 1 dør.
- Utedoen på Snauasete skal plasserast i utkanten av stølsvollen, som avmerkt på kartet i saksopplysingane.
- Søkjar må ha naudsynt samtykke frå andre grunneigarar/rettshavarar på Snauasete før doen vert sett opp.
- Utedoen skal tilpassast i terrenget utan vesentleg terrenginngrep, og skal plasserast slik at den ikkje vert dominerande i landskapet.
- Utedoen skal byggjast med tremateriale, og ha same form som vist på bilde i saksopplysingar. Utedoen skal ikkje målast. Kledningsmaterialet skal grånast naturleg. Taket skal vera av tre, bølgjeblekk eller torv.
- Tiltakshavar er ansvarleg for vedlikehald og eventuell tømning av utedoen. Etter byggearbeidet er avslutta, skal restmateriale og utstyr takast hand om og transporterast ut av området.
- Dersom utedoen fører til problem av noko slag, skal tiltakshavar fjerna utedoen, og området skal ryddast for inngrep og materiale.
- Utedoen bør vera tilgjengeleg for andre turgåarar i området.



- Løyve til oppstart av tiltaket gjeld i 3 år frå vedtaksdato. Det skal sendast rapport med bilde frå tiltaket til sekretariatet når arbeidet er slutført.

Saksopplysningar

Dokument som bakgrunn for saka:

- Søknad om løyve til oppsetting av do, Snauasete. *Stigen Gard og Turer*, 24.06.2021
- Saksprotokoll 38/21 - 07.06.2021, Nærøyfjorden verneområdestyre – Nærøyfjorden landskapsvernområde – Snauasete – utedo på stølen
- Saksprotokoll 26/20 – 24.06.2020, Nærøyfjorden verneområdestyre - Nærøyfjorden landskapsvernområde – Snauasete – restaurerer sel – Dee Cunningham og Hege Strømme

Saka vert vurdert etter:

- Forskrift om vern av Nærøyfjorden landskapsvernområde av 08.11.2002
- Naturmangfaldlova av 19.06.2009
- Forvaltningsplan for Nærøyfjorden, rapport nr. 1 – 2008

Stigen Gard og Turer har fått løyve av Nærøyfjorden verneområdestyre til å restaurera stølshuset på Snauasete, og sette opp ein utedo på 1 x 1 meter. Dei har sendt inn ny søknad om utviding av bygget til utedoen for å få plass til ved. Det er søkt om utviding av bygget til 2 x 2 meter. Bakgrunnen for søknaden er at det ikkje er lagringsplass for ved i stølshuset. Kjellaren i stølshuset er lite eigna då den er svært fuktig, og det kjem snø inn i kjellaren om vinteren.


Bygget skal ha same utforming som opphavleg plan for utedoen. Bildet viser godkjent form på bygget.





Bilde av utedo på Nedste Stigen. Utedo på Snauasete skal ha same utforming som denne utedoen. Foto: Anbjørg Nornes

Kartet under viser godkjent plassering av utedoen.



Kart med plassering av utedo. Utedo markert med raudt bygg.

Lovgrunnlaget

«Føremålet med Nærøyfjorden landskapsvernområde er å ta vare på eit vakkert og eigenarta natur- og kulturlandskap frå fjord til fjell i eit storfelt isbreutforma landskap med eit mangfald av plante- og dyreliv og der eit kulturlandskap med slåtteteigar, beitelandskap, stølsområde, gardsbruk og kulturminne, skapt gjennom aktiv landbruks-drift, utgjer ein vesentleg del av landskapets karakter» jf. verneforskrifta § 2.

Nærøyfjorden landskapsvernområde er «..verna mot alle inngrep eller tiltak som vesentleg kan endre eller verke inn på landskapets art eller karakter» jf. verneforskrifta § 3, pkt.1.1. Området er verna mot «...oppføring av anlegg og faste innretningar...» jf. § 3 pkt. 1.1. a). Forvaltningsstyresmakta kan gje løyve til «Oppføring av nybygg i samband med landbruk, turlagsverksemd og oppsyn» jf. verneforskrifta § 3 punkt 1.3 b). Utedoen kan ikkje vurderast etter desse reglane. Forvaltninga kan i særskilte høve vurderer om det er heimel til tiltak etter naturmangfaldlova § 48 fyrste ledd fyrste og alternativ som seier at «Forvaltningsmyndigheten kan gjøre unntak frå et vernevedtak dersom det ikkje strider mot vernevedtakets formål og ikkje kan påvirke verneverdiene nevneverdig». Det må vurderast



om vilkåra for å gje dispensasjon etter naturmangfaldlova § 48 er oppfylt, og om det kan gjevast dispensasjon til tiltaket.

Etter naturmangfaldlova (nml.) § 7 skal prinsippa i §§ 8-12 leggjast til grunn ved utøving av offentleg mynde, og det skal koma fram av vedtaket korleis prinsippa er vurdert og vektlagt i saka.

Vurdering

Snauasete er ein fjellstøl som ligg ca. 1000 moh. Det kan vera mykje snø i dette området om vinteren. For å ha tilgang på ved om vinteren, bør veden lagrast under tak. Det er ikkje god lagringsplass for ved i kjellaren i stølshuset, og det er difor naudsynt med eige bygg til ved. Utviding av utedoen med 1 x 1 meter er ei dobling av grunnflata, men er framleis eit lite bygg. Tiltaket er vurdert som ei kurrant sak, og vert difor behandla som delegert sak.

Forvaltar vurderer det som ei god løysing å utvida utedoen til eit bygg på 2 x 2 meter i staden for å sette opp endå eit bygg, eller sette opp tilbygg på stølshuset. Vurderingane som vart lagt til grunn for vedtaket om bygging av utedo vert ikkje endra av denne utvidinga, og forvaltar legg difor desse vurderingane til grunn for vedtaket om utviding av bygget. Det er sett same vilkåra for utviding av bygget, som dei vilkåra som vart gjeve til bygging av utedoen (sak 38/21).

Vurdering sak 38/21

Snauasete ligg i Nærøyfjorden landskapsvernområde. Å ta vare på kulturlandskapet med stølsområda er eit av føremåla med vern av Nærøyfjorden landskapsvernområde. Det er positivt av stølshuset på Snauasete er sett i stand og vert brukt. Det er vanleg forvaltningspraksis i dette verneområdet og andre verneområde, å gje løyve til oppføring av utedo på stolar. Utedoane er vurdert som naudsynt for å dekkja normale funksjonar for ei hytte/stølshus, og tiltaket kan redusera faren for ureining av område. I forvaltningsplanen for Nærøyfjorden er tema utedo omtalt under fleire tema. I kapittel om friluftsliv – tiltak for tilrettelegging for friluftsliv, står det at «Dersom omsynet til naturkvalitetane tilseier det, skal naudsynte tiltak gjerast for å unngå skadar som skuldast friluftslivet». Under kapittel om forsøpling og ureining står det at det kan førast opp «utedo der det syner seg naudsynt». Tiltaket er eit lite bygg, og er i nærleiken av andre inngrep. Bygget vil i liten grad påverka landskapet sin art og karakter. Forvaltar vurderer at det er heimel for å vurdera tiltaket etter nml. § 48 fyrste ledd og fyrste alternativ.

Området er del av Fjellheimen villreinområde, og ligg akkurat innanfor grensa av det som er definert som vinterbeiteområde for reinen. I 2020 vart det av søker observert kolle med kalv i området i pinsehelga, noko som viser at området vert brukt også på våren. Det vil vere veldig viktig å passe på at det ikkje er rein i området under transporten i samband med byggearbeidet.

Det er ikkje registrert trua artar eller naturtypar i området (naturbase 14.05.2021). Kunnskapsgrunnlaget jf. nml. § 8 er vurdert som godt for å vurdera saka, og føre-var prinsippet jf. nml. § 9 er difor ikkje vektlagt i saka.



Forvaltninga skal vurdera den samla belastninga på økosystemet av eit tiltak jf. nml. § 10. Eit av føremåla til Stigen Gard og Turer med å restaurera stølshuset, er å ta med gjester på tur til Snauasete for overnatting. I saksprotokoll 26/20 med vedtak om løyve til å restaurere stølshuset, vart den samla belastninga på området av eventuell auka ferdsel vurdert. Der vart det trekt fram at tilrettelegging for auka trafikk kan på sikt føre til auka belastning for villreinen i området. For å redusera konflikten med villreininteressene, vart søkjar oppmoda om å ha god dialog med villreinnemnda og verneområdestyret for bruk av området.

Ved bruk av området vil det vera trong for ein utedo. Det er ikkje plass i stølshuset til do, og det er difor naudsynt å sette opp eit eige bygg. Utedoen vil kunne vera med å hindre ureining av området. Det er vurdert at tiltaket med utedo ikkje vil føra til auka belastning på naturverdiane eller verneverdiane i området. Søkjar er ansvarleg for tiltaket, og må ta kostnadane med å fjerna utedoen dersom den fører til skade på verneverdiane jf. nml. § 11.

Kulturlandskapet på Snauasete framstår som eit historisk kulturlandskap med eit restaurert stølshus og fleire murar etter stølshus. Riktig plassering av utedoen vil ha stor betydning for at ta vare på dette kulturlandskapet. Samtidig må ikkje utedoen føra til avrenning til vatn og vassdrag. Plasseringa i utkanten av stølsvollen er vurdert som ei god plassering som i liten grad påverkar landskapet, og plasseringa vil ikkje føra til ureining av vassdrag. Utedoen er eit lite bygg på 1 x 1 meter, og vil kunne tilpassast i terrenget slik at den ikkje vert dominerande i landskapet. Plassering og utforming er vurdert som godt tilpassa miljøet jf. nml. § 12. Med dei føringane som er gjeve for plassering, vurderer forvaltar at tiltaket ikkje er i strid med verneføremålet.

Konklusjon

Etter ei samla vurdering etter naturmangfaldlova §§ 8-12, meiner forvaltar tiltaket ikkje vil påverka verneverdiane nemneverdig, og det vil ikkje vera i strid med verneføremålet. Med heimel i verneforskrifta for Nærøyfjorden landskapsvernområde og naturmangfaldlova § 48 fyrste ledd og fyrste alternativ, vurderer forvaltar at det kan gjevast løyve til å utvida utedo-bygget til ei grunnflate på 2 x 2 meter.

